



ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՍԱՀՄԱՆԱԴՐԱԿԱՆ ԴԱՏԱՐԱՆ

ԴԱՏԱԿԱՆ ԿԱԶՄԻ ՈՐՈՇՈՒՄ

ԱՆՀԱՏԱԿԱՆ ԴԻՄՈՒՄԻ ԸՆԴՈՒՆԵԼԻՈՒԹՅԱՆ ՎԵՐԱԲԵՐՅԱԼ

Քաղ. Երևան

17 սեպտեմբերի 2025 թ.

Սահմանադրական դատարանի դատական կազմը՝

Նախագահությամբ՝ Հ. Հովակիմյանի

Անդամակցությամբ՝ Ա. Զեյնալյանի

Դ. Խաչատուրյանի

Քննության առնելով Ազիզ Ուսոյանի անհատական դիմումի
ընդունելիության հարցը,

Պ Ա Ր Զ Ե Ց .

1. Ազիզ Ուսոյանը (այսուհետ նաև՝ Դիմող) դիմել է Սահմանադրական դատարան (դիմումը Սահմանադրական դատարան է մուտքագրվել 2025 թվականի օգոստոսի 29-ին)՝ խնդրելով.

««Ճանապարհային երթևեկության անվտանգության ապահովման մասին» օրենքի 29-րդ հոդվածի 4-րդ մասը ճանաչել ՀՀ Սահմանադրության առաջին՝ իրավական պետության մասով, 28-րդ, 29-րդ, 78-րդ հոդվածներին, 71-րդ հոդվածի 2-րդ մասին հակասող»:

* Դիմումը «Սահմանադրական դատարանի մասին» սահմանադրական օրենքի 24 և 25-րդ հոդվածներով սահմանված պահանջներին համապատասխանացվելուց հետո վերստին ներկայացվել է 2025 թվականի սեպտեմբերի 8-ին:

2. Դիմողը նշում է, որ վիճարկվող դրույթով «(...) **լրացուցիչ պարտականություններ նախատեսելը, ոչ միայն դուրս է գալիս վարչական օրենսգրքով հետապնդվող նպատակներից, այլ իր մեջ պարունակում է որոշակի պարժի փարրեր, ինչն անթույլատրելի է իրավական պետությունում և հակասում է օրենքի առջև հավասարության ու արդարացիության սահմանադրական երաշխիքներին**»:

Դիմողը գտնում է, որ վիճարկվող իրավակարգավորմամբ նախատեսված պարտավորությունը «(...) ոչ միայն հակասում է ՎԻՎ օրենսգրքին, այլև՝ **չունի օբյեկտիվ բնույթ, հիմնավորված չէ և չի հետապնդում իրավաչափ նպատակ, հետևապես «օրենք» չէ և չպիտի անձի նկատմամբ կիրառվի**»:

Ըստ Դիմողի՝ վիճարկվող դրույթով սահմանված՝ վարորդական իրավունքի վերականգնման համար որակավորման քննություն հանձնելու պահանջը «(...) չի ծառայում երթևեկության անվտանգության ապահովման նպատակին, այսինքն՝ պահանջը թեև օրենքով է նախատեսված, սակայն **լեգիտիմ չէ**, քանի որ պարզ չէ, թե այդ պայմանը ինչ կորելացիայի մեջ է երթևեկության անվտանգության հետ»:

Հավելելով՝ Դիմողը պնդում է, որ «(...) եթե վարորդական իրավունք չունեցողի, այն ստանալու համար որակավորման քննության սահմանումը, ողջամտորեն բխում է երթևեկության անվտանգության ապահովման նպատակից, ուստի պիտանի և անհրաժեշտ է այդ նպատակին հասնելու համար, սակայն **այդ իրավունքն ունեցողի նկատմամբ օրենքով արգելված արարքի կատարման** հիմքով դադարեցված վարելու իրավունքի վերականգնման **նախապայմանի սահմանումը չի կարող պիտանի, առավել ևս անհրաժեշտ համարվել, քանի որ չկա որևէ ողջամիտ պարճառ, թե ինչով է պայմանավորված՝ պարիժը կրելուց հետո անձի վրա դրված լրացուցիչ պարտավորությունը**, առավել ևս երբ որակավորման քննություն հանձնելու պայմանը պարասխանավորություն նախատեսող նորմի սանկցիայով նախատեսված չէ՝ ոչ որպես հիմնական և ոչ էլ որպես լրացուցիչ պարիժ»:

Դիմողը գտնում է, որ «(...) **քննարկվող նորմով սահմանված պայմանը ոչ այլ ինչ է, եթե ոչ կիրառված պարժի շարունակություն, քողարկված պարիժ, որն ինքնին՝ հակասահմանադրական է**»:

Ամփոփելով՝ Դիմողը եզրահանգում է, որ վիճարկվող՝ «(...) «**Ճանապարհային երթևեկության անվտանգության ապահովման մասին**» օրենքով հեղափոխվող իրավաչափ նպատակի տեսանկյունից նույն օրենքի 29-րդ հոդվածի 4-րդ մասով սահմանված պայմանը «**օրենք**» կոչվել չի կարող, քանի որ այն լեգիտիմ նպատակ չի հեղափոխում, պիտանի և անհրաժեշտ չէ օրենքով հեղափոխվող հանրային շահի տեսանկյունից, ավելին՝ այն խաթարում է մասնավոր և հանրային շահերի հավասարակշռությունը, ինչպես նաև իր բնույթով խտրական է»:

Միաժամանակ, Դիմողը սույն անհատական դիմումին կից ներկայացված միջ-նորդությամբ Սահմանադրական դատարանին խնդրել է իրեն ազատել պետական տուրքի վճարումից կամ դրա վճարումը հետաձգել այն հանգամանքների հաշվառմամբ, որ վերջինս, առողջական խնդիրներով պայմանավորված, առայժմ չի կարողանում աշխատել, ապրում է միայնակ և, բացառությամբ տնամերձից ստացված համեստ բերքի, այլ եկամուտներ չունի:

3. Ելնելով դիմումի և կից փաստաթղթերի ուսումնասիրությունից, ինչպես նաև ղեկավարվելով «Սահմանադրական դատարանի մասին» սահմանադրական օրենքի (այսուհետ նաև՝ Սահմանադրական օրենք) 29 և 69-րդ հոդվածների պահանջներով՝ Սահմանադրական դատարանի դատական կազմը գտնում է, որ սույն անհատական դիմումով գործի քննությունը ենթակա է մերժման՝ հետևյալ պատճառաբանությամբ.

Սահմանադրության 169-րդ հոդվածի 1-ին մասի 8-րդ կետի համաձայն՝ Սահմանադրական դատարան կարող է դիմել յուրաքանչյուր ոք՝ կոնկրետ գործով, երբ առկա է դատարանի վերջնական ակտը, **սպառվել են դատական պաշտպանության բոլոր միջոցները**, և վիճարկում է այդ ակտով իր նկատմամբ կիրառված նորմատիվ իրավական ակտի դրույթի սահմանադրականությունը, ինչը հանգեցրել է Սահմանադրության 2-րդ գլխում ամրագրված իր հիմնական իրավունքների և ազատությունների խախտման՝ հաշվի առնելով նաև համապատասխան դրույթին իրավակիրառ պրակտիկայում տրված մեկնաբանությունը:

Սահմանադրական վերոհիշյալ նորմն իր ամրագրումն է ստացել նաև Սահմանադրական օրենքի 69-րդ հոդվածի 1-ին մասում: Հիշյալ դրույթը սահմանում է այն

հիմքերը, որոնց միաժամանակյա առկայության պարագայում ֆիզիկական կամ

իրավաբանական անձը կոնկրետ գործով անհատական դիմում կարող է ներկայացնել Սահմանադրական դատարան: Դրանք են՝

ա) երբ կոնկրետ գործով առկա է դատարանի վերջնական ակտը,

բ) երբ սպառվել են ներպետական դատական պաշտպանության բոլոր միջոցները,

գ) երբ վիճարկվում է այդ ակտով իր նկատմամբ կիրառված նորմատիվ իրավական ակտի դրույթի սահմանադրականությունը, ինչը հանգեցրել է Սահմանադրության 2-րդ գլխում ամրագրված իր հիմնական իրավունքների և ազատությունների խախտման՝ հաշվի առնելով նաև համապատասխան դրույթին իրավակիրառ պրակտիկայում տրված մեկնաբանությունը:

Սահմանադրական օրենքի 29-րդ հոդվածի 1-ին մասի 2-րդ կետի համաձայն՝ Սահմանադրական դատարանը գործի քննությունն ամբողջությամբ կամ մասամբ մերժելու մասին աշխատակարգային որոշում է ընդունում՝ **եթե դիմողն իրավասու չէ տվյալ հարցով դիմելու Սահմանադրական դատարան:**

Սահմանադրական օրենքի 29-րդ հոդվածի 1-ին մասի 6-րդ կետի համաձայն՝ Սահմանադրական դատարանը գործի քննությունն ամբողջությամբ կամ մասամբ մերժելու մասին աշխատակարգային որոշում է ընդունում նույն օրենքի 69-րդ հոդվածով նախատեսված **այլ դեպքերում:**

Սահմանադրական օրենքի 69-րդ հոդվածի 5-րդ մասի համաձայն՝ անհատական դիմումներով գործի քննությունը, ի լրումն նույն օրենքի 29-րդ հոդվածով նախատեսված դեպքերի, կարող է մերժվել նաև այն դեպքում, **երբ դիմողը չի սպառել դատական պաշտպանության բոլոր միջոցները:**

Սահմանադրական դատարանը 2009 թվականի մարտի 17-ի ՍԴԱՌ-21 աշխատակարգային որոշմամբ արձանագրել է. «(...) «Սահմանադրական դատարանի մասին» ՀՀ օրենքի 69 հոդվածի 1-ին մասում նշված **որևէ պայմանի բացակայության դեպքում անհատական դիմում ներկայացրած ֆիզիկական կամ իրավաբանական անձը սահմանադրական դատարան դիմելու համար իրավասու սուբյեկտ չէ**»:

Սահմանադրական դատարանը վերը նշված ՍԴԱՌ-21 աշխատակարգային որոշմամբ արտահայտել է նաև դիրքորոշում առ այն, որ «(...) ֆիզիկական և իրավաբանական անձանց համար սահմանադրական դատարան դիմելու հնարավորու-

թյունը ծագում է քաղաքացիաիրավական, վարչաիրավական վեճերի կարգավորման, ինչպես նաև քրեական մեղադրանքի կապակցությամբ կայացված վերջնական դատական ակտի և համապատասխանաբար՝ նշված վեճերի և քրեական մեղադրանքի հարցի լուծման իրավազորությամբ օժտված դատական մարմիններում պաշտպանության միջոցներն սպառելու արդյունքում: (...) Սահմանադրական «կոնկրետ վերահսկողության» նպատակն է ապահովել սահմանադրական արդարադատություն իրականացնելու իրավազորությամբ չօժտված՝ ընդհանուր իրավասության և մասնագիտացված դատարանների կողմից կոնկրետ գործերի լուծումը Սահմանադրությանը համապատասխանող օրենքների հիման վրա և իրականացնել անձի սահմանադրական իրավունքների պաշտպանությունը, երբ նրա իրավունքները խախտվել են արդարադատության իրականացման գործընթացում հակասահմանադրական օրենսդրական նորմի կիրառման արդյունքում»:

Սահմանադրական դատարանը 2019 թվականի հոկտեմբերի 24-ի ՍԴԴԿՈ-58 դատական կազմի որոշմամբ արձանագրել է. «Դատական պաշտպանության բոլոր միջոցները սպառելու սահմանադրական պահանջից բխում է, որ եթե առկա է կամ առկա է եղել որևէ դատական ատյան, որը կարող է (էր) քննել դիմողի կողմից բարձրացված հարցը, սակայն դիմողը չի օգտվել այդ հնարավորությունից, ապա դիմողը չի սպառել դատական պաշտպանության բոլոր միջոցները»:

Սահմանադրական դատարանի դատական կազմն արձանագրում է, որ սույն անհատական դիմումի և դիմումին կից ներկայացված դատական ակտերի ուսումնասիրության արդյունքում պարզ է դառնում, որ **Դիմողը չի իրացրել ներպետական դատական պաշտպանության բոլոր միջոցներն սպառելու սահմանադրական պահանջը:**

Մասնավորապես՝ թիվ ՎԴ/9989/05/23 վարչական գործի շրջանակներում Վճռաբեկ դատարանը 2025 թվականի հուլիսի 2-ին կայացրել է «Վճռաբեկ բողոքն առանց քննության թողնելու մասին» որոշում, որով արձանագրել է. «Վճռաբեկ դատարանը գտնում է, որ թեև Վերաքննիչ դատարանի 12.03.2025 թվականին հրապարակված (թվագրված՝ 10.03.2025 թվական) որոշումը բողոքաբերին ուղարկվել է 19.03.2025 թվականին (գ.թ. 95), այսինքն՝ ՀՀ վարչական դատավարության

օրենսգրքի 114-րդ հոդվածի 7-րդ մասի և 149-րդ հոդվածի 1-ին մասի պահանջների խախտմամբ, նշված որոշումը բողոքաբերը ստացել է 20.03.2025 թվականին և վճռաբեկ բողոքը ներկայացնելիս իր հերթին խախտել է օրենքով սահմանված վճռաբեկ բողոք բերելու ժամկետը՝ վճռաբեկ բողոքը ներկայացնելով դատական ակտն ստանալու օրվանից՝ 20.03.2025 թվականից, հաշված մեկամսյա ժամկետի ավարտից հետո՝ 12.05.2025 թվականին, մինչդեռ կարող էր ներկայացնել 21.04.2025 թվականը ներառյալ, իսկ միջնորդությունը հիմնավորումներ չի պարունակում վճռաբեկ բողոքը Վերաքննիչ դատարանի որոշումն ստանալու պահից մեկամսյա ժամկետի խախտմամբ ներկայացնելու պատճառների հարգելիության մասին:

Նման պայմաններում Վճռաբեկ դատարանը գտնում է, որ վճռաբեկ բողոքը պետք է թողնել առանց քննության, քանի որ վճռաբեկ բողոքը բերվել է սահմանված ժամկետը լրանալուց հետո, և բաց թողնված ժամկետը վերականգնելու մասին միջնորդությունը մերժվել է»:

Արդյունքում՝ Վճռաբեկ դատարանը որոշել է.

«1. Ազիզ Ուսոյանի միջնորդությունը՝ ՀՀ վերաքննիչ վարչական դատարանի 10.03.2025 թվականի (հրապարակված՝ 12.03.2025 թվականին) որոշման դեմ վճռաբեկ բողոք բերելու համար սահմանված ժամկետը բաց թողնելու պատճառը հարգելի համարելու և բաց թողնված ժամկետը վերականգնելու մասին, մերժել:

2. Թիվ ՎԴ/9989/05/23 վարչական գործով ՀՀ վերաքննիչ վարչական դատարանի 10.03.2025 թվականի (հրապարակված՝ 12.03.2025 թվականին) որոշման դեմ Ազիզ Ուսոյանի ներկայացրած վճռաբեկ բողոքը թողնել առանց քննության:

(...)»:

Վերոշարադրյալի կապակցությամբ Սահմանադրական դատարանը 2022 թվականի հուլիսի 8-ի ՍԴԱՌ-120 աշխատակարգային որոշմամբ ընդգծել է, որ սահմանադրական արդարադատություն հայցելու անձի իրավունքը, ինչպես նաև օրենսդրությամբ դրա իրացման նպատակով նախատեսված ընթացակարգային կարգավորումներն ինքնանպատակ չեն, ուստիև հայեցողաբար մեկնաբանվել չեն կարող: Նշված կարգավորումները միտված են դիմողի կողմից նախքան Սահմանադրական

դատարան դիմելու իրավունքն իրացնելն իր ենթադրյալ խախտված իրավունքների և ազատությունների վերականգնման համար օրենսդրությամբ **նախատեսված բոլոր հնարավորություններն սպառելուն:**

Սահմանադրական դատարանի դատական կազմը փաստում է, որ Դիմողը, ունենալով Վճռաքննիչ վարչական դատարանի համապատասխան որոշման դեմ վճռաբեկ բողոք ներկայացնելու իրավունք (իրական հնարավորություն), ներկայացրել է վճռաբեկ բողոք՝ միաժամանակ միջնորդելով հարգելի համարել վճռաբեկ բողոք բերելու համար սահմանված ժամկետը բաց թողնելու պատճառը և վերականգնել այն, որը Վճռաբեկ դատարանի կողմից մերժվել է: Նշվածի արդյունքում Դիմողի ներկայացրած վճռաբեկ բողոքը թողնվել է առանց քննության:

Այս կապակցությամբ Սահմանադրական դատարանի դատական կազմն արձանագրում է, որ **Դիմողը պատշաճ կերպով չի իրացրել իր ենթադրյալ խախտված իրավունքների և ազատությունների վերականգնման համար օրենսդրությամբ նախատեսված բոլոր հնարավորություններն սպառելու պահանջը, քանի որ Վճռաբեկ դատարանի կողմից 2025 թվականի հուլիսի 2-ի «Վճռաբեկ բողոքն առանց քննության թողնելու մասին» որոշման կայացման հիմքում ընկած է հենց Դիմողի կողմից իր իրավունքների իրացման նպատակով անհրաժեշտ օրենսդրական պահանջները չպահպանելը:**

Հաշվի առնելով վերոշարադրյալը՝ Սահմանադրական դատարանի դատական կազմը գտնում է, որ Դիմողը չի սպառել ներպետական դատական պաշտպանության բոլոր միջոցները՝ նկատի ունենալով այն հանգամանքը, որ ժամանակագրական տեսանկյունից Դիմողի նկատմամբ կայացված վերջին դատական ակտը թիվ ՎԴ/9989/05/23 վարչական գործով Վճռաբեկ դատարանի 2025 թվականի հուլիսի 2-ի որոշումն է, որի բովանդակությունից, մասնավորապես՝ վճռաբեկ բողոքն առանց քննության թողնելու հիմքից բխում է, որ այն չի կարող համարվել Դիմողի կողմից բարձրացված հարցի կապակցությամբ օրենսդրությամբ նախատեսված՝ ներպետական դատական պաշտպանության բոլոր միջոցների սպառում:

Հետևաբար՝ Սահմանադրական դատարանի դատական կազմն արձանագրում է, որ սույն անհատական դիմումով գործի քննությունը ենթակա է մերժման՝ «Սահմանադրական դատարանի մասին» սահմանադրական օրենքի 29-րդ հոդվածի

1-ին մասի 2 և 6-րդ կետերով, ինչպես նաև 69-րդ հոդվածի 5-րդ մասով սահմանված՝ ներպետական դատական պաշտպանության բոլոր միջոցները չսպառելու, Սահմանադրական դատարանի դիմելու համար իրավասու սուբյեկտ չլինելու հիմքերով:

Ելնելով վերոշարադրյալից և ղեկավարվելով «Սահմանադրական դատարանի մասին» սահմանադրական օրենքի 29-րդ հոդվածի 1-ին մասի 2 և 6-րդ կետերի, ինչպես նաև 69-րդ հոդվածի 5-րդ մասի պահանջներով՝ Սահմանադրական դատարանի դատական կազմը

Ո Ր Ո Շ Ե Ց .

1. Բավարարել Ազիզ Ուսոյանի՝ սույն գործով պետական տուրքի վճարումից ազատելու մասին միջնորդությունը:

2. Ազիզ Ուսոյանի անհատական դիմումով գործի քննությունը մերժել:

Նախագահող՝

Անդամներ՝



Հ. Հովակիմյան

Ա. Զեյնալյան

Դ. Խաչատուրյան

17 սեպտեմբերի 2025 թվականի
ՍԴԴԿՈ-51